

D.R. 37/2017

RANG UNDANG-UNDANG

b e r n a m a

Suatu Akta untuk meminda Akta Agensi Penguatkuasaan Maritim Malaysia 2004.

[]

DIPERBUAT oleh Parlimen Malaysia seperti yang berikut:

Tajuk ringkas

1. Akta ini bolehlah dinamakan Akta Agensi Penguatkuasaan Maritim Malaysia (Pindaan) 2017.

Seksyen baharu 5A, 5B, 5C dan 5D

2. Akta Agensi Penguatkuasaan Maritim Malaysia 2004 [*Akta 633*], yang disebut “Akta ibu” dalam Akta ini, dipinda dengan memasukkan selepas seksyen 5 seksyen yang berikut:

“Penubuhan Pasukan Sukarelawan Maritim Malaysia

5A. Suatu badan ditubuhkan yang dikenali sebagai Pasukan Sukarelawan Maritim Malaysia.

Anggota Pasukan Sukarelawan Maritim Malaysia

5B. (1) Mana-mana orang boleh memohon untuk menjadi anggota Pasukan Sukarelawan Maritim Malaysia jika—

- (a) dia berumur lapan belas tahun atau lebih;
- (b) dia seorang warganegara Malaysia;
- (c) dia mempunyai kelayakan yang ditentukan oleh Ketua Pengarah; dan
- (d) dia memenuhi kehendak lain yang ditentukan oleh Ketua Pengarah.

(2) Suatu permohonan untuk menjadi anggota Pasukan Sukarelawan Maritim Malaysia hendaklah dibuat dalam borang dan mengikut cara yang ditentukan oleh Ketua Pengarah.

(3) Ketua Pengarah boleh meluluskan atau menolak mana-mana orang menjadi anggota Pasukan Sukarelawan Maritim Malaysia.

(4) Ketua Pengarah boleh memanggil mana-mana anggota Pasukan Sukarelawan Maritim Malaysia untuk melaksanakan secara sukarela apa-apa tugas yang ditentukan oleh Ketua Pengarah.

(5) Seseorang anggota Pasukan Sukarelawan Maritim Malaysia adalah tertakluk kepada arahan, perintah dan kawalan Ketua Pengarah semasa melaksanakan apa-apa tugas di bawah subseksyen (4).

(6) Seseorang anggota Pasukan Sukarelawan Maritim Malaysia—

- (a) boleh dibayar apa-apa elaun yang ditentukan oleh Menteri selepas berunding dengan Menteri Kewangan; dan
- (b) tidak berhak kepada apa-apa saraan.

(7) Seseorang anggota Pasukan Sukarelawan Maritim Malaysia semasa melaksanakan apa-apa tugas di bawah Akta ini hendaklah disifatkan sebagai penjawat awam mengikut pengertian Kanun Keseksaan [*Akta 574*].

Penubuhan Pasukan Kadet Maritim Malaysia

5c. Menteri boleh menubuhkan suatu badan yang dikenali sebagai Pasukan Kadet Maritim Malaysia bagi mana-mana kawasan di Malaysia.

Pendaftaran ke dalam Pasukan Kadet Maritim Malaysia

5d. (1) Mana-mana orang boleh memohon untuk didaftarkan ke dalam Pasukan Kadet Maritim Malaysia jika—

(a) tertakluk kepada Akta Pendidikan 1996 [*Akta 550*], dia seorang murid yang menjalani pelajaran sepenuh masa di mana-mana sekolah menengah yang ditentukan oleh Menteri setelah berunding dengan Menteri yang dipertanggungjawabkan dengan tanggungjawab bagi pelajaran; atau

(b) dia seorang pelajar—

(i) yang berdaftar dan mengikuti bidang pengajian atau latihan sama ada sepenuh masa atau separuh masa di mana-mana institusi pengajian atau latihan yang ditentukan oleh Menteri setelah berunding dengan Menteri yang dipertanggungjawabkan dengan tanggungjawab bagi institusi pengajian atau latihan itu;

(ii) yang merupakan warganegara Malaysia; dan

(iii) yang berumur di bawah tiga puluh tahun.

(2) Suatu permohonan untuk didaftarkan ke dalam Pasukan Kadet Maritim Malaysia hendaklah dibuat dalam borang dan mengikut cara yang ditentukan oleh Ketua Pengarah.

(3) Ketua Pengarah boleh mendaftarkan atau enggan mendaftarkan mana-mana orang ke dalam Pasukan Kadet Maritim Malaysia.

(4) Mana-mana orang yang telah didaftarkan ke dalam Pasukan Kadet Maritim Malaysia tidak berhak kepada apa-apa elaun atau saraan.”

Seksyen baharu 7A

3. Akta ini dipinda dengan memasukkan selepas seksyen 7 seksyen yang berikut:

“Kuasa tambahan

7A. (1) Sebagai tambahan kepada dan tanpa menjejaskan kuasa sedia ada Agensi di bawah Akta ini, apabila membawa dan menjaga mana-mana orang dalam tahanan Agensi, seseorang pegawai Agensi hendaklah mempunyai segala kuasa seorang pegawai polis yang berpangkat Koperal dan lebih rendah dan kuasa seorang pegawai penjara yang berpangkat Sarjan dan lebih rendah di bawah Akta Penjara 1995 [*Akta 537*].

(2) Bagi maksud Akta ini—

- (a) jika sesuatu perintah, perakuan atau apa-apa perbuatan lain dikehendaki supaya diberikan, dikeluarkan atau dilakukan oleh seseorang pegawai penjaga Daerah Polis di bawah mana-mana undang-undang bertulis, perintah, perakuan atau perbuatan itu boleh diberikan, dikeluarkan atau dilakukan oleh seseorang pegawai Agensi dan bagi maksud itu, tempat perintah, perakuan atau perbuatan itu diberikan, dikeluarkan atau dilakukan hendaklah disifatkan sebagai Daerah Polis di bawah jagaannya;
- (b) seseorang pegawai Agensi hendaklah mempunyai segala kuasa yang diberikan kepada seseorang pegawai penjaga balai polis di bawah mana-mana undang-undang bertulis, dan bagi maksud itu pejabat pegawai itu hendaklah disifatkan sebagai suatu balai polis; dan
- (c) seseorang pegawai Agensi hendaklah mempunyai segala kuasa seorang pegawai polis tidak kira apa jua pangkatnya sebagaimana yang diperuntukkan di bawah Kanun Tatacara Jenayah dan Akta Pendaftaran Penjenayah dan Orang-Orang Yang Tidak Diingini 1969 [*Akta 7*], dan kuasa itu

hendaklah sebagai tambahan kepada kuasa yang diperuntukkan di bawah Akta ini dan bukan pengurangannya, tetapi sekiranya terdapat apa-apa ketidakselarasan atau percanggahan antara peruntukan Akta ini dengan peruntukan Kanun Tatacara Jenayah, peruntukan Akta ini hendaklah mengatasi peruntukan Kanun Tatacara Jenayah.”.

Pindaan seksyen 10

4. Seksyen 10 Akta ibu dipinda dengan memasukkan selepas perkataan “pegawai Agensi” perkataan “atau mana-mana anggota Pasukan Sukarelawan Maritim Malaysia”.

Pindaan seksyen 11

5. Seksyen 11 Akta ibu dipinda—

(a) dalam teks bahasa kebangsaan—

(i) dengan memasukkan selepas perkataan “pegawai Agensi” perkataan “dan anggota Pasukan Sukarelawan Maritim Malaysia”; dan

(ii) dengan memasukkan selepas perkataan “pegawai” di mana-mana jua terdapat perkataan “atau anggota”; dan

(b) dalam teks bahasa Inggeris, dengan memasukkan selepas perkataan “officer of the Agency” perkataan “and member of the Malaysian Maritime Volunteer Corps”.

Pindaan seksyen 18

6. Seksyen 18 Akta ibu dipinda dengan memasukkan selepas perkataan “pegawai-pegawai Agensi” perkataan “dan anggota Pasukan Sukarelawan Maritim Malaysia”.

HURAIAN

Rang Undang-Undang ini bertujuan untuk meminda Akta Agensi Penguatkuasaan Maritim Malaysia 2004 (“Akta 633”).

2. *Fasal 1* mengandungi tajuk ringkas Akta yang dicadangkan.
3. *Fasal 2* bertujuan untuk memasukkan seksyen baharu 5A, 5B, 5C dan 5D ke dalam Akta 633.

Seksyen baharu 5A yang dicadangkan bertujuan untuk mengadakan peruntukan bagi penubuhan Pasukan Sukarelawan Maritim Malaysia.

Seksyen baharu 5B yang dicadangkan bertujuan untuk mengadakan peruntukan bagi orang yang boleh menjadi anggota Pasukan Sukarelawan Maritim Malaysia. Seksyen baharu 5B juga bertujuan untuk memperuntukkan bahawa seseorang anggota Pasukan Sukarelawan Maritim Malaysia boleh dipanggil untuk melaksanakan apa-apa tugas dan anggota itu adalah di bawah arahan, perintah dan kawalan Ketua Pengarah. Seksyen baharu 5B selanjutnya memperuntukkan bahawa seseorang anggota Pasukan Sukarelawan Maritim Malaysia semasa melaksanakan apa-apa tugas di bawah Akta 633 hendaklah disifatkan sebagai seorang penjawat awam.

Seksyen baharu 5C yang dicadangkan bertujuan untuk mengadakan peruntukan bagi penubuhan Pasukan Kadet Maritim Malaysia dan seksyen baharu 5D yang dicadangkan mengadakan peruntukan bagi orang yang boleh didaftarkan ke dalam Pasukan Kadet Maritim Malaysia.

4. *Fasal 3* bertujuan untuk memasukkan seksyen baharu 7A ke dalam Akta 633 untuk memperuntukkan bahawa pegawai Agensi hendaklah mempunyai segala kuasa seorang pegawai polis yang berpangkat Koperal dan lebih rendah dan kuasa seorang pegawai penjara yang berpangkat Sarjan dan lebih rendah di bawah Akta Penjara 1995 [*Akta 537*] apabila membawa dan menjaga mana-mana orang dalam tahanan Agensi. Perenggan 7A(2)(b) bertujuan untuk menyifatkan pejabat Agensi sebagai suatu balai polis bagi maksud Akta 633.

5. *Fasal 4* bertujuan untuk meminda seksyen 10 Akta 663 untuk mengadakan peruntukan bagi perlindungan kepada mana-mana anggota Pasukan Sukarelawan Maritim Malaysia daripada dikenakan apa-apa tindakan yang telah dilakukan atau yang ditinggalkan daripada dilakukan olehnya dengan suci hati dalam melaksanakan tugasnya di bawah Akta 633.

6. *Fasal 5* bertujuan untuk meminda seksyen 11 Akta 633 untuk memperuntukkan bahawa anggota Pasukan Sukarelawan Maritim Malaysia hendaklah apabila diminta, mengisytiharkan jawatannya dan mengemukakan kad kuasa yang dikeluarkan kepada anggota itu dalam melaksanakan tugasnya di bawah Akta 633.

7. *Fasal 6* bertujuan untuk meminda seksyen 18 Akta 633 untuk memberikan kuasa kepada Ketua Pengarah untuk mengeluarkan Perintah Tetap berhubung dengan kawalan am, latihan, tugas dan tanggungjawab anggota Pasukan Sukarelawan Maritim Malaysia.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3070]